



ANWAR Ibrahim (lima dari kiri) bergambar bersama ketua-ketua kerajaan negara ASEAN dan Australia selaku tuan rumah pada sesi pemukiman Sidang Kemuncak ASEAN-Australia di Melbourne semalam.

# PM gesa gencatan senjata selamanya di Gaza

**MELBOURNE:** Perdana Menteri menggesa gencatan senjata diadakan serta-merta dan selamanya di Gaza.

Datuk Seri Anwar Ibrahim pada sesi pemukiman Sidang Kemuncak ASEAN-Australia, mengingatkan pemimpin ASEAN dan Australia telah mengundi menyokong resolusi Perhimpunan Agung Pertubuhan Bangsa-Bangsa Bersatu (PBB) pada Disember 2023, yang menuntut gencatan senjata kemanusiaan.

"Kita harus mendesak agar tuntutan ini direalisasikan.. segera dan selamanya," kata Perdana Menteri.

Gesaan itu jelasnya lagi mengambil kira situasi yang

berlaku di Gaza kini semakin teruk dengan lebih 30,000 orang awam Palestin telah terbunuh termasuk lebih daripada 12,000 kanak-kanak, manakala bayi yang tidak berdosa mati kelaparan dan kebuluran hampir pasti terjadi.

"Justeru, gencatan senjata yang segera dan selamanya amat diperlukan," katanya.

Perdana Menteri berkata, pemberian bantuan kemanusiaan yang selamat, cepat dan tidak dihalang kepada orang awam yang tidak bersalah di seluruh Gaza perlu dibenar serta dipertahankan.

"Malaysia mendesak komuniti antarabangsa supaya mengambil tindakan lebih berani

untuk mendesak Israel mematuhi langkah-langkah sementara yang dikeluarkan oleh Mahkamah Keadilan Antarabangsa pada Januari tahun ini dan menggesa semua pihak untuk mencegah tindakan genosid di Gaza," katanya.

Anwar berkata, Malaysia juga menggesa supaya negara-negara tidak mendahului keputusan siasatan ke atas tuduhan baru-baru ini yang membabitkan beberapa anggota agensi Pertubuhan Bangsa-Bangsa Bersatu (PBB) untuk Pelarian Palestin (UNRWA), selain mempertimbang semula hukuman kolektif yang dikenakan serta menggesa agar sokongan kewangan kepada UNRWA dapat

dipulihkan.

"Sebagai pelaku negara yang bertanggungjawab, kita terikat oleh Piagam PBB dan undang-undang antarabangsa untuk mempertahankan prinsip asas demi keadilan.

"Hak untuk menentukan nasib sendiri yang kita tuntut dan hargai untuk diri sendiri juga harus dilindungi dan dipertahankan demi rakyat Palestin," katanya.

Anwar berkata, pengakhiran pencerobohan Israel ke atas wilayah Palestin yang berlaku selama berdekad adalah penting demi penyelesaian dua negara yang berfungsi, selain keamanan dan keselamatan yang berkekalan di Asia Barat.